

MORPHOLOGY OF THE GHANAIAIAN LANGUAGE

BY

KWAME NKETSIAH (PHD)

ƆFA KOR MƆFƆLƆGYI (MORPHOLOGY)

Nyienyim

Dem kɔs yi bobue esuafo hɔn enyiwa wɔ ndzɛmba bi a ɔfa mɔfɔlɔgyi ho na kwan a wɔfa do ye mɔfɔlɔgyi mpɛnsampɛnsamu wɔ Akan kasa mu ho. Kɔs yi besan aboa esuafo ma woegyina mɔɔfem hɔn dwumadzi, bea a wɔhye na hɔn bɔbea (form) do akyekye mɔɔfem mu. Wɔbesan enya nyimdzee afa alomɔf, mɔɔfem, mɔɔf na mbatoho (affixes) ho. Esuafo botum ehu akwan ahorow bi so a yetum fa do nya nkasafua afofor bɛka Akan nkasafua ho. Afei gye mber na yenhye hɛn adzesua no ase.

Ebenadze nye mɔfɔlɔgyi?

Linguistics mu no, mɔfɔlɔgyi ye adzesua a ɔfa nkasafua nhyehyee ho. Mɔfɔlɔgyi adzesua hwe nkitahodzi a ɔda mɔɔfem ahorow ntamu na kwan a wosi fa do hyehye dem mɔɔfem ahorow yi ma wɔbeyɛ nkasafua afofor anaa kasafua kor noara n'ahorow bi (new forms of the same word). Yenam mɔfɔlɔgyi do so tum hu kasafua bi no ndwow (root) na ne mbataho ahorow a ɔwɔ.

Mfatoho

mpanyimfo = m + panyin + fo

Sɛ yɛfa mfatoho a ɔwɔ sor ha yi a, kasafua **mpanyimfo** wɔ asɛndwow (root word) a ɔye **“panyin”** na mbataho a kor wɔ enyim **“m”** na kor so wɔ ekyir **“fo”**. Iyi kyere de dem mɔɔfem ahorow yi na yɛaka abɔ mu ma yeenya kasafua mpanyimfo. Iyi ntsi na yɛkyere mɔfɔlɔgyi mu de ɔye adzesua a ɔhwehwe kasafua nhyehyee mu no.

Mɔɔfem (morpheme)

Mɔɔfem ye kasafua bi ne fa a osuar koraa a ɔwɔ ntsease anaa ɔkyere dwumadzi. Ɔye ketsekette koraa a sɛ wɔkye mu a ɔnnkɛye yie anaa ntsease biara nnkɛba mu. Hom mma yenhwe mfatoho a ɔka do yi:

- | | | |
|--------------|---|-----------------|
| 1. dua | = | dua |
| 2. ndua | = | n + dua |
| 3. ekristofo | = | e + kristo + fo |

Sɛ yɛhwe mfatoho a odzi kan no a, kasafua **“dua”** wɔ mɔɔfem kor per osiande yennkotum akye mu bio ma yeenya ntsease wɔ nkyekyemu a yɛbeyɛ no mu anaa nkyemu no akyere dwumadzi

biara. Mfatoho a ɔto do ebien no mu no, yebotum akye kasafua “*ndua*” mu ma yeenya mɔɔfem ebien a wɔye “*n*” na “*dua*”. Yehu de “*n*” no ye mɔɔfem a oridzi dwuma de dodow ahyensewdze (plural) wɔ kasafua no mu nna “*dua*” no so wɔ ntsease na ɔsan so dzi dwuma de ndwowa dze ma kasafua no.

Mfatoho a ɔto do ebiasa no so yebotum akyekye enya mɔɔfem ebien: “*e...fo*” na “*kristo*”. Dem nkyekyemu yi mu biara wɔ dwuma a oridzi wɔ kasafua no mu. Se yehwe a, nsienyim “*e*” na nsienyir “*fo*” no nyinara ka bɔ mu dzi dwuma kor de dodow ahyensewdze wɔ kasafua no mu nna “*kristo*” no so ye kasafua a ɔwɔ ntsease na ɔsan so ye asendwowa ma kasafua no. Dza ɔwɔ de etse ase nye de nsienyim “*e*” na nsiekyir “*fo*” no ka bɔ mu dzi dwuma kor. ɔnam dem ntsi yefa hon de wɔye mɔɔfem kor na nnye ebien bi. Se otwar de mɔɔfem nya ntsease kor per anaa dwumadzi kor per dze a nna mfom biara nnyi ho de yebeka de “*e*” na “*fo*” ye mɔɔfem kor. Hom betse iyi ase yie wɔ adzesua no ne finimfin ho beebi.

Hye no nsew bio de ɔnon selabol nkyekyemu na ɔson mɔɔfem nkyekyemu wɔ kasafua mu. bio so, mɔɔfem no ye adze bi a yewa no wɔ hen adwen mu (abstract). Yennhu, yennkyerew anaa yennka. Tɔfabɔ mu no, yebotum aka de kasafua nhyehyee mu no, dza osuar koraa a ntsease wɔ mu no na yefre no mɔɔfem.

Mɔɔf (morph)

Mɔɔf ye kwan a mɔɔfem bi fa do da noho edzi anaa kwan a yefa do hu mɔɔfem bi. Ono nye de, mɔɔf ye akyerew anaa ahyensewdze a yedze gyina ho ma mɔɔfem. Mɔɔf no na ɔboa ma yehu mɔɔfem no a yewa no wɔ hen adwen mu no wɔ enyiwa do anaa akyerew mu. Yefa mɔɔf no de ɔwɔ adwen mu ntsi ɔnam mɔɔf do na yetum hu anaa tse dza ɔwɔ hen adwen mu no. Iyi kyere de kasafua ne fa biara a yebu no de ɔye mɔɔfem no san so ye mɔɔf.

Alomɔf (allomorph)

Se yeka de alomɔf a ɔye kwan ahorow a mɔɔfem bi tum da no edzi wɔ kasafua mu anaa su ahorow a mɔɔfem bi tum nya. Mɔɔfem bi wɔ ho a otum sesa noho anaa ɔda noho edzi wɔ akwan ahorow pii do ɔnam bea a ɔhye anaa dwuma a oridzi wɔ kasafua bi mu ntsi. Dem kwan ahorow anaa su ahorow a dem mɔɔfem no tum da no edzi no na yefre no alomɔf no. Hom mma yenhwe mfatoho a ɔka do yi:

Mfatoho

1. a. **nda**
b. **mba**
2. a. **abofra**
b. **ɔbaa**
3. a. **huruwii**
b. **fowee**

Sɛ yɛfa mfatoho a odzi kan no a, yebotum aka dɛ “**n**” na “**m**” no yɛ alomɔf osiandɛ hɔn nyinara rekyerɛ dodow wɔ nkasafua no mu. Iyi kyere dɛ sɛ yɛfa dodow mɔɔfem no a otum da noho edzi yɛ “**n**” na odu beebi so a otum yɛ “**m**” na dza ɔkeka ho. Dem a nna ɔkyerɛ dɛ dem mɔɔfem kor a ɔkyerɛ dodow no na ɔada noho edzi wɔ akwan ahorow ebien do ɔnam nkasafua a oridzi dwuma wɔ mu ntsi.

Demara na sɛ yɛfa mfatoho a ɔtɔ do ebien no a, “**a**” na “**ɔ**” yɛ alomɔf osiandɛ hɔn beenu no nyinara yɛ kwan a mɔɔfem a ɔrekyerɛ ankonam no da noho edzi wɔ nkasafua nkasafua no mu. Dza ɔboa hɛn ma yehu dɛ nkasafua ebien no wɔ ankonam mu nye “**a**” na “**ɔ**” a wodzi kan no. Iyi kyere dɛ dɛ wɔyɛ akwan ahorow ebien a ankonam mɔɔfem no afa do ada noho edzi wɔ nkasafua no mu.

Mfatoho a ɔtɔ do ebiasa no mu so, alomɔf a wɔwɔ mu nye “**ii**” na “**ee**”. Iyinom yɛ akwan ahorow ebien a apaho kabea mɔɔfem no ada noho edzi. Ɔno nye dɛ, apaho kabea kor noara na yereka ho aɛm mbom yehu no wɔ akwan soronko do wɔ nkasafua no mu. Dem nsesa yi gyina ngyegyee a wɔwɔ nyɛe no mu no do. Iyi kyere dɛ ndzɛmba bi wɔ hɔ a wotum nya nsunsuando wɔ alomɔf ne mfae do. Hom mma yenhwe dem ndzɛmba no wɔ ɔfa a ɔtoa do yi mu.

NDZEMBA A WOTUM NYA NSUNSUANDO WƆ ALOMƆF DO (CONDITIONS THAT DETERMINE THE CHOICE OF AN ALLOMORPH)

Yeedzi kan ehu wɔ hɛn adzesua yi mu dɛ alomɔf yɛ su ahorow anaa kwan ahorow a mɔɔfem bi da noho edzi wɔ kasafua mu. Dza ɔwɔ dɛ yehu nye dɛ ansaana mɔɔfem bi botum afa su fofor bi no ɔwɔ dɛ biribi na ogya no ma ɔfa dɛm su no. Iyi kyere dɛ ndzɛmba bi wɔ hɔ a ɔnam hɔn do ma alomɔf ba. Dɛm ndzɛmba a wotum nya nsunsuando wɔ alomɔf do nye:

1. Fɔnɔlɔgyi (phonologically conditioned)
 2. Kasa mbra / Grama (grammatically conditioned)
 3. Kasafua no ankasa no su (lexically conditioned)
- **Nsakyɛr a ɔnam fɔnɔlɔgyi do:** Odu beebi a ngyegyee a wɔdze edzi dwuma wɔ kasafua no mu ma mɔɔfem no rekebata ho no tum kyere su kor a ɔwɔ dɛ dɛm mɔɔfem no onya ama koryɛ aba hɔn ntamu.

Mfatoho

a. mba

nda

b. sui

woe

Sɛ yɛhwɛ mfatoho a odzikan no mu a, alomɔf a wɔwɔ mu nye “**m**” na “**n**” a hɔn nyinara rekyerɛ dodow. Dza odzi kan no yɛ “**m**” osiandɛ ngyegyee a orikesi n’enyim wɔ kasafua no mu no (b) yɛ anofamfa kɔnsonant. ɔnam dɛm ntsi ɔwɔ dɛ alomɔf no so yɛ dza ɔyɛ anofamfa anaa ɔfa anofamfa su ama ngyegyee ebien no eetum ayɛ kor atsena. Demara so na sɛ yɛfa dza ɔtɔ do ebien wɔ mfatoho a odzikan no mu no a, ngyegyee a alomɔf no rekebata ho no yɛ se-ekyir a ɔnnye anofamfa. ɔnam dɛm ntsi ɔwɔ dɛ dodow ahyɛnsewdze no sesa no sun a ɔfa su a ɔnye ngyegyee a ɔrekebata ho no yɛ kor. Iyi ntsi na dodow ahyɛnsewdze no adan noho abeyɛ “**n**” wɔ dɛm kasafua no mu ɔnam ngyegyee a ɔnye no rekɛtsena no ntsi.

Demara so na sɛ yɛhwɛ mfatoho a ɔtɔdo ebien no a alomɔf a wɔwɔ mu nye “**i**” na “**e**” a hɔn nyinara rekyerɛ apaho kabea. Yehu dɛ iyinom so ngyegyee a wɔrekebata ho wɔ ekyir no na ɔkyerɛ su a ɔwɔ dɛ apaho ahyɛnsewdze no nya. Ngyegyee a ɔwɔ mfatoho a odzi kan no mu no yɛ kankɔ ngyegyee ntsi alomɔf no so wɔ dɛ ɔyɛ dza ɔyɛ kankɔ nna ngyegyee a ɔwɔ mfatoho a ɔtɔ do

ebien no mu no so ye annko kan dem ntsi alomof a orekaka noho no so wo de oye dza oye annko kan. Ono ntsi na yehu apaho kabea mofem no wo akwan ahorow anaa su ahorow mu no.

- **Nsaker a onam kasa mbra anaa grama do:** Odu mber bi a kasa mbra anaa grama tum nya nsunsuando wo alomof do anaa su a owo de mofem bi tum nya do. Kasa mbra a wodge ridzi dwuma no tum kyere su kor a alomof bi nnya wo kasafua mu.

Mfatoho

a. boow nsa

bowee

Se yehwe mfatoho a owo sor ha yi a, kwan ahorow a apaho kabea mofem no da noho edzi wo nkasafua no mu nye “o” na “ee”. Dem su ahorow yi anaa nsaker yi dzi Mfantse kasa mbra no do. Mfantse mu no se nye bi wo oyetsia na yedze roko apaho mu a ono yebɔ vawol a owo nye no mu no ho. Mbom se nye no nnyi oyetsia na odze konsonant wie na vawol a owo nye no mu no ye annko kan a yedze “ee” ye ahyensewdze ma apaho kabea no. Iyi ntsi se yehu de apaho kabea mofem kor noara ada noho edzi de “o” wo kasafua a odzi kan no mu na oada noho edzi so de “ee” wo kasafua a oto do ebien no mu a, nna onam kasa mbra no ntsi.

- **Nsaker a ogyina kasafua no ankasa do:** Odu beebi a, kasafua a wodge ridzi dwuma no ankasa tum kyere kwan a mofem bi nsi nda noho edzi wo mu wo ber a orinngyina kasa mbra anaa ngyegyee biara do.

Mfatoho

a. Kum abowa

Kor Nkran

b. adan

ngo

c. wo

nnyi

Se yehwe mfatoho a odzi kan no a, alomof a wowo mu nye “m” na “r” a hon nyinara ye kwan a apaho mofem no fa do da noho edzi. Se yehwe, nkasafua no ankasa na wokyere kwan a apaho mofem no mfa do nda noho edzi wo hon mu wo ber a wonndzi kasa mbra no do. Yenyim de kasa mbra no kyere de se nye bi wo oyetsia na yedze roko apaho mu a nkye owo de yebɔ vawol

a ɔwɔ nyɛɛ no mu no ho naaso sɛ yɛhwɛ mfatoho yi mu a yennhu biribi a ɔtse dem mbom nkasafua no ankasa na wɔkyerɛ kwan a apaho mɔɔfem no nsi nda edzi wɔ hɔn mu a ɔyɛ “m” na “r”.

Mfatoho a ɔtɔ do ebien no mu no so yehu dɛ dodow mɔɔfem no da noho edzi dɛ “a” wɔ kasafua a odzi kan no mu naaso sɛ yɛfa kasafua a ɔtɔ do ebien no a dodow ahyɛnsewdze no esuma. Iyi ntsi yebotum aka dɛ kasafua “ngo” rekyerɛ dɛ ɔno ɔmmpe mbataho biara a ɔbɛda edzi wɔ akyerɛw no mu ntsi no dodow na ankonam nyinara wɔnkyerɛw no kor.

Dem a nna yebotum aka dɛ alomɔf yɛ kwan ahorow a mɔɔfem bi tum da noho edzi wɔ kasafua mu anaa su ahorow a mɔɔfem bi tum nya wɔ kasafua mbom dza ɔwɔ dɛ yɛhyɛ no nsew nye dɛ su ahorow anaa akwan ahorow no gyina ndzɛmba bi do na ɔbɛba. Dem ndzɛmba a ahorow a wonya nsunsuando wɔ alomɔf do yi na yɛapensapensamu wɔ ha yi.

MɔɔF AHOROW BI (OTHER MORPHS)

Yɛwɔ mɔɔf ahorow bi so a ɔwɔ dɛ yɛhyɛ no nsew wɔ hɛn adzesua yi mu. Hɔn nye Ohun mɔɔf (zero morph), Hwee mɔɔf (Empty morph) na Potomanto mɔɔf (portmanteau). Hom mma yɛmfɛ hɔn nkokor nka ho asem kakra.

Ohun mɔɔf (zero morph)

Ohun mɔɔf yɛ mɔɔf a ɔnnda edzi wɔ kasafua no mu anaaso yennhu no wɔ kasafua no mu naaso odzi dwuma wɔ kasafua no mu. ɔno nye dɛ, sɛ wɔkyerɛw kasafua no to hɔ a, yennhu ohun mɔɔf no n’ahyɛnsewdze biara wɔ kasafua no mu. Hom mma yɛnhwɛ mfatoho a ɔka do yi:

Mfatoho

Ankonam

- a. nsu
- b. edziban
- c. nyimpa

dodow

- nsu
- edziban
- nyimpa

Sɛ yɛhwɛ mfatoho a wɔwɔ sor yi a ankonam na dodow no nyinara hɔn akyerɛw yɛ pɛr. Yennhu mɔɔfem anaa mɔɔf biara a ɔrekyerɛ dodow wɔ kasafua no mu naaso yɛgyɛ dzi dɛ wɔhyɛ mu ridzi dwuma wɔ kasafua no mu. Dem a nna yebotum aka dɛ ohun mɔɔf yɛ mɔɔf a oesuma anaa ɔnnda edzi wɔ kasafua no mu.

Hwee mɔɔf (Empty morph)

Hwee mɔɔf yɛ mɔɔf a yehu anaa ɔda edzi wɔ kasafua no mu naaso onnyi ntsease biara. Ono nye de hwee mɔɔf no yetum yehu wɔ kasafua no mu naaso onndzi dwuma biara wɔ mu. ɔbata ho ara keke. Onam dem ntsi se yeyi mɔɔf a ɔtse dem no fi kasafua no mu a ɔmmfa nsesa biara mmba kasafua no ne ntsease anaa no dwumadzi mu. Iyi kyere de ɔbata ho ara keke naaso biribiara nnyi mu anaa ntsease biara nnyi mu.

Mfatoho

- a. ɔbanyin - banyin
- b. ɔsikanyi - sikanyi
- c. mbanyimfo - mbanyin

Se yehwe mfatoho a odzi kan na dza ɔto do ebien no a, mɔɔf a wɔhyɛ nkasafua no enyim no (ɔ na o) rommbɔ bra biara anaa nnkitsu ntsease biara. Wɔmmfa hwee nnka nkasafua no hɔn nkyerease anaa wɔnnkyere dwumadzi biara wɔ nkasafua no mu. Onam dem ntsi se yeyi fi nkasafua no mu mpo a nkasafua no hɔn ntsease nnsesa demara so na wɔda ho ara ye ankonam. Demara so na yefa mfatoho a ɔto do ebiasa no a, “fo” no a odzi ewiei no ye hwee mɔɔf osiande ɔno so nndzi dwuma biara. Nnye ɔno na ɔrekyere dodow kabea wɔ kasafua no mu. Onam dem ntsi yetum yi fi ho ma yenya “*mbanyin*” wɔ ber a ɔmmfa nsesa biara mmba kasafua no mu anaa ne kabea mu.

Potomanto mɔɔf (Portmanteau morph)

Potomanto mɔɔf yɛ mɔɔf kor a ɔma hen ntsease a ɔbor kor anaaso mɔɔf ebien a wɔbɔmu dzi dwuma kor. Ono nye de, potomanto mɔɔf tum yɛ mɔɔf kor a wonyae fii nkasafua ebien mu ɔnam dem ntsi ntsease a ɔdze ma no bor kor. Demara so na otum yɛ mɔɔf ebien a wɔbɔ mu dzi dwuma kor per. Hom mma yenhwe mfatoho a ɔka do yi:

- i. aborɔkɔ (*aborɔfo* + *akokɔ*)
- ii. ayefor (*ayer* + *fofor*)
- iii. aborɔbe (*aborɔfo* + *abe*)
- iv. esuafo
- v. mpanyimfo
- vi. enuanom

Se yefa mfatoho a odzi kan no (aborɔkɔ) a, ɔye mɔɔf anaa kasafua kor a wonyae fii nkasafua ebien mu. Onam dem ntsi ntsease a ɔba hen adwen mu anaa ɔdze ma hen no bor kor. Ɔwɔ mu de

yenyae fii nkasafua ebien mu dze naaso se yekye kasafua “aborɔko” mu a ɔnnkyeyɛ yie ma yeenya ntsease biara. Demara na mfatoho a ɔto do ebien na dza ostia ebiasa no so tse.

Se yefa mfatoho a ostia anan no a, kasafua “esuafo” no kitsa mɔɔf anaa mɔɔfem ebien: “e....fo” na “sua”. Iyi mu no yehu de “mbataho ebien no “e” na “fo” ka bo mu dzi dwuma wo kasafua no mu. Wɔrekyere dodow anaa woye dodow kyerefo. Onam de hon ebien no nyinara ka bo mu dzi dwuma kor ntsi se woye ebien mpo a yefa hon de woye adze kor na onam de woye ebien na woridzi dwuma kor ntsi woye potomanto mɔɔf. Demara na “m” na “fo” a wowo kasafua “mpanyimfo” no mu so tse. Iyi ntsi na yeka de potomanto mɔɔf tum ye mɔɔf kor a oma ntsease a ɔbor kor anaaso mɔɔf ebien a wodzi dwuma kor no.

TSIR EBIEN

MŌFEM NKYEKYEMU (CLASSIFICATION OF MORPHEME)

Se yereka a yetum gyina ndzamba bi do kyekye mōfem mu ma yenza ekuw ahorow. Ndzamba a yetum gyina do anaa yehwe ho dze ye nkyekyemu no nye mōfem no no bōbea (form), bea a ohye wō kasafua no mu (distribution) na dwuma a odzi wō kasafua no mu (function). Afei hom ngye mber na yendo mu esuko.

MŌFEM NKYEKYEMU A OGYINA BŌBEA DO (FORM)

Se yegyina bōbea do kyekye mōfem mu a ugu mu ahorow etsitsir eben. Dem nkyekyemu yi hwe de ana mōfem no tum gyina noho do anaa onntum ngyina noho do mbom gyede wōdze bata mōfem fofor ansaana. Se yegyina bōbea do kyekye mōfem mu a ekuw eben a yenza nye:

- Mōfem Tsitsir anaa Odzenoho Mōfem (Free morpheme)
- Mfemfamho/ Onndzenoho/Mbataho Mōfem (Bound morpheme)

Odzenoho Mōfem/Mōfem Tsitsir

Odzenoho mōfem anaa mōfem tsitsir ye mōfem a nankotsee tum gyina noho do de kasafua a ntsease wō mu. Dem mōfem yi nnhia de odze noho bebata mōfem fofor bi ho ansaana oedzi no dwuma anaa oato asowa mu anaa oetum egyina de kasafua.

Mfatoho

<i>Sika</i>	<i>dan</i>	<i>ntsi</i>	<i>pe</i>
<i>tsena</i>	<i>dua</i>	<i>banyin</i>	<i>skuul</i>
<i>nsu</i>	<i>naaso</i>	<i>mbom</i>	<i>nyimpa</i>

Se yehwe mfatoho a owo sor ha yi nyinara a no mu biara nankotsee tum gyina noho do de kasafua. Wonnhia de yedze hon bebata kasafua fofor bi anaa mōfem fofor bi ho ansaana wōama ntseasee. Odzenoho mōfem gu mu ahorow eben. Hon nye **Kasafua mōfem** (lexical morpheme) na **Dwumadzi mōfem** (functional morpheme).

- **Kasafua mōfem (Lexical morpheme)**

Kasafua mōfem ye mōfem tsitsir a oye kasafua na nankotsee da ho so a okitsa ntsease a odzi mu. Dem mōfem yi yenza fi nkasafuakuw etsitsir (major word classes) no mu de bi a nyee, edzin, dzintamsi na nyetamsi.

Mfatoho

hor	tsena	abow
-----	-------	------

tuntum	asɔr	tsentsen
bɔkɔɔ	nyaa	ndeda

- **Dwumadzi mɔɔfem (functional morpheme)**

Dwumadzi mɔɔfem yɛ ɔɔzenoho mɔɔfem a sɛ nankotsee da hɔ a ɔyɛ kasafua naaso onnkitsa ntsease a odzi mu anaa ne ntsease no nnda edzi papa. Mɔɔfem a wɔtse dem yi no mpen pii no ɔkyerɛ dwumadzi na nkitahodzi a ɔɔda nkasafua anaa nsentɔw ntamu. Dem mɔɔfem yi so yɛnya fi nkasafuakuw nkakramba (minor word classes) no mu tse dɛ bi a nkaɔɔmudze, dzin-bea nkitahodzi, oyikyɛrɛ, na dzinkyɛananmu.

Mfatoho

na	mbom	do
ase	no	bi
me	hɛn	hom

Ɔnndzenoho/Mfemfamho Mɔɔfem (Bound morphemes)

Mfemfamho mɔɔfem yɛ mɔɔfem bi a nankotsee nntum nngyina noho do nndzi dwuma gyedɛ wɔɔɔɔ bata mɔɔfem fofor bi ho ansaana ɔama ntsease anaa ɔakyɛrɛ dwumadzi pɔtsee bi. Iyi kyɛrɛ dɛ sɛ mfemfamho mɔɔfem nankotsee da hɔ a onnyi ntsease biara nna ɔnnkyɛrɛ dwuma biara so. Sɛ yebotum ehu no dwumadzi a nna gyedɛ wɔɔɔɔ abata mɔɔfem fofor bi ho ansaana. mfemfamho mɔɔfem gu mu ahorow etsitsir ebien wɔ Akan mu. Hɔn nye **mbataho** (affixes) na **mfemfamho asɛndwɔw** (bound roots).

Mbataho (Affixes)

Mbataho yɛ mfemfamho mɔɔfem a wɔɔɔɔ fam asɛndwɔw, asɛndua anaa kasafua bi ho a otum sesa kasafua no ne ntsease anaa no dwumadzi. Yebotum yeegyina ndzɛmba ebien do akyekyɛ mbataho mu – bea a mbataho no hyɛ wɔ kasafua mu na dwuma a mbataho no dzi wɔ kasafua no mu.

NKYEKYEMU A OGYINA BEA A MƆƆFEM NO HYE DO

Sɛ yegyina bea anaa beebi a mbataho bi hyɛ wɔ kasafua mu do jyejye mu a yɛnya ahorow anan. Hɔn nye: **nsienyim, nsiekyir, nsimu na ntwaho**.

- i. **Nsienyim (prefix):** Iyi yɛ mfemfamho mɔɔfem anaa mbataho bi a aber biara wɔdze hyɛ mɔɔfem fofor bi anaa kasafua bi n'enyim.

Mfatoho

a. ndua

b. apon

c. ɔkɔm

- ii. **Nsiekyir (suffix):** Iyi yɛ mbataho anaa mfemfamho mɔɔfem a wɔdze ba kasafua anaa mɔɔfem fofor bi n'ekyir.

Mfatoho

a. Skuulnyi

b. Yernom

c. Nomee

d. Sui

- iii. **Nsimu (infix):** Iyi yɛ mfemfamho mɔɔfem anaa mbataho bi a wɔdze hyɛ kasafua no n'asendwow no ne finimfin. Hyɛ no nsew dɛ dem mɔɔfem yi anaa mbataho yi nnye adze a odzi akotsen pii wɔ Akan kasa mu ntsi mpɛn pii no noho mfatoho nyae yɛ dzen.

Mfatoho

a. bra (come – command)

b. toow ndwom

Sɛ yɛhwe mfataho a odzi kan yi a, asendwow no anaa kasafua (nyɛɛ) no ankasa yɛ **ba** (to come) mbom sɛ yɛdze rokɔ ɔhyɛ mu a nna yɛdze mbataho anaa mɔɔfem “**r**” no hyɛ kasafua no ne finimfin. Demara na mfatoho a ɔtɔ do ebien no mu no yehu dɛ apaho ahyɛnsewdze “**o**” no hyɛ kasafua anaa nyɛɛ “tow” ne finimfin.

- iv. **Ntwaho (circumfix):** Iyi yɛ mbataho anaa mfemfamho mɔɔfem ebien a wotwa kasafua noho hyia. Dem mbataho yi aber biara kor wɔ enyim na kor so wɔ ekyir ntsi ibohu na kasafua no abɛhyɛ finimfin. Hyɛ no nsew dɛ ntwaho mɔɔfem no hɔn beenu no nyinara ka bɔ mu dzi dwuma kor. Onam dem ntsi yɛfa hɔn beenu no nyinara dɛ ɔyɛ mɔɔfem kor.

Mfatoho

- a. **Mpanyimfo**
- b. **Ebusuafo**
- c. **Akyerekyerεfo**
- d. **Enuanom**
- e. **Okuanyi**

NKYEKYEMU A OGYINA DWUMADZI DO

Sε yegyina mɔɔfem anaa mbataho hɔn dwumadzi do kyekye mu a yεnya ekuw ebien. Hɔn nye **Nyafimu mɔɔfem** (derivational) na **Nsesamu mɔɔfem** (Inflectional).

- i. **Nyafimu mɔɔfem (Derivational morpheme):** Iyi ye mfemfamho mɔɔfem a sε wɔdze ka kasafua bi ho a ɔma kasafua no ne kasafuakuw (word class) a ɔwɔ mu no sesa kɔ kasafuakuw fofor mu. Sε wɔdze dεm mɔɔfem yi ka kasafua bi ho a otum sesa kasafua no ne ntsease anaa ɔsesa kasafua no ne kasafuakuw a ɔwɔ mu kɔ kasafuakuw fofor mu.

Mfatoho

Nyεε		dzin
a. kɔm	-	akɔm
b. wu	-	ɔwu
c. dɔ	-	ɔdɔ
d. sua	-	ɔsuanyi / esuafo

Sε yεhwε mfatoho a ɔwɔ sor ha yi a, dza odzi kan no nyinara ye nyεε, Sε wɔdze nyafimu mɔɔfem ahorow no femfamho a wɔsesa fi nyεε bεyε edzin. Iyi ntsi yehu dε mfatoho ahorow yi nyinara hɔn nkasafuakuw a nna wɔwɔ dadaw a ɔyε nyεε no asesa abεyε dzin.

- ii. **Nsesamu mɔɔfem (Inflectional morpheme):** ɔyε mfemfamho mɔɔfem anaa mbataho bi a sε wɔdze ka kasafua bi ho a ɔnnsesa ne kasafuakuw mbom ɔsesa kasafua no no su anaa ne kabea ara. Dε bi a, ɔsesa no fi ankonam mu kɔ dodow mu anaa fi kabea kor mu kɔ kabea fofor mu.

Mfatoho

Ankonam		Dodow
a. pon	-	apon

b. banyin	-	mbanyin
c. dua	-	ndua

Daa Kabea		Igudo reyε kabea
d. ye	-	reyε
e. kɔ	-	rokɔ

Daa Kabea		Ayεesie Kabea
f. fow	-	afow
g. hu	-	ehu

Sε yεfa mfatoho a ɔwɔ sor ha yi a, mfatoho ebiase a wodzi kan no nyinara ye edzin a wɔwɔ ankonam mu. Sε yedze nsienyim ahorow no keka ho a, ɔsesa hɔn ma wɔbeyε dodow mbom ɔnnsesa hɔn mmfi kasafuakuw no mu ntsi mfatoho a wɔwɔ dodow kabea mu no so nyinara ye edzin dε mbre dza ɔwɔ ankonam mu no tse no ara.

Sε yεfa mfatoho a wɔtɔ do anan na enum no a, nkasafua “ye” na “kɔ” ye nyεe a wɔwɔ daa kabea mu. Sε yedze nsienyim “re” na “ro” no bata ho a, ɔsesa hɔn fi daa kabea mu kɔ igudo reyε kabea mu mbom wɔnnsesa mmfi nyεe mu. Demara na mfatoho ebien a wodzi ekyir no so tse. Sε yedze “a” na “e” no ye nsienyim ma nyεe “fow” na “hu” a, wɔsesa hɔn kɔ ayεesie kabea mu mbom wɔnnsesa mmfi nyεekuw no mu.

Muabɔ
Mɔɔfem Nkyekyɛmu




Figure 1: Mɔɔfem Nkyekyɛmu (Classification of morphemes)

ASENDWOW, ASENDUA NA BEESI (ROOT, STEM AND BASE)

Dem ɔfa yi so ka nkasafua nkyekyɛmu no ho. Asendwow, asendua na beesi ye edzin bi a wɔdze dzi dwuma dze kyere kasafua ne fa bi a ɔaka wɔ ber a woeyi mbataho nyinara efi hɔ anaade wɔ ber a wɔdze mbataho pɔtsee bi aka ho. Hom mma yenhwe hɔn nkyerekyerɛmu na mfatoho bi.

Asendwow (root)

Asendwow ye kasafua ne fa bi a onnyi mbataho biara. Se yefa kasafua bi na woyi noho mbataho nyinara a, dza ɔka no na yefre asendwow no. Dem ntsi yebotum aka de asendwow ye kasafua anaa mɔɔfem bi a onnyi nsienyim, nsiekyir, nsimu na ntwaho biara. Asendwow no nye kasafua biara ne ntsin anaa ne fapem a ogyina do. Hye no nsew de nnye aber biara na asendwow no to asowa mu anaa de ɔwo ntsease a odzi mu. Yewo asendwow bi wɔ hɔ a gyede mbataho bi abeka ho ansaana oenya ntsease anaa ɔato asowa mu. Dem asendwow no wɔfre no mfemfamho asendwow (bound root).

Mfatoho

- a. dua
- b. dan
- c. ba
- d. **a-bofra**

Se yehwe mfatoho ebiasa a wodzi kan no a nkasafua a wowa ho no nyinara ye asendwow osiande wonnyi mbataho biara. Yennhu nsienyim, nsiekyir anaa ntwaho biara wo nkasafua ebiasa a wodzi kan no mu. Mbom se yefa mfatoho a oto do anan no a asendwow a owo kasafua no mu nye “**bofra**” osiande ono na oye kasafua no ne ntsin. “**a**” no a ohye “bofra” n’enyim no ye nsienyim anaa mbataho a orekyere ankonam. Dem ntsi se yeyi ono fi ho a dza oka nye “bofra”. Iyi na oma “bofra” ye asendwow no osiande yeehu de asendwow ye mofem anaa kasafua ne fa bi a onnyi mbataho biara wo no ho.

Asendua (stem)

Asendua ye kasafua ne fa bi anaa asendwow a otum fa nsesamu mofem bata noho na aber biara so owo ntsease. Otum so ye asendwow ebien a wodze abo mu anaa asendwow na mbataho a wodze abo mu na otum fa nsesamu mofem. Iyi kyere de asendua no nntum mmfa mofem fofor biara nnka noho gyede nsesamu (inflectional) mofem nkotsee.

Mfatoho

- a. *dan*
- b. *dua*
- c. *banyin*
- d. **ba**

Mfatoho a wowa sor ha yi nyinara tum ye asendua osiande hon nyinara tum fa nsesamu mofem na afei so no mu biara wo ntsease. Yebotum dze nsesamu mofem a okyere dodow abata ho ma yeenya nkasafua bi tse de:

- a. *adan*
- b. *ndua*
- c. *mbanyin*
- d. **mba**

Beesi (base)

Beesi ye mɔɔfem anaa kasafua ne fa bi a otum fa mbataho biara wɔ noho. Ono nye dɛ, beesi ye mɔɔfem anaa kasafua ne fa a otum fa nsesamu na nyafimu mɔɔfem no mu biara fam noho. Owɔ dɛ etse ase dɛ asendwow biara ye beesi mbom nnye beesi biara na otum ye asendwow. Bio, kasafua bi wɔ hɔ a obotum aye asendwow, asendua na beesi nyinara.

Mfatoho

- a. sua
- b. sua-e
- c. **e-sua-fo**

Sɛ yɛfa mfatoho a odzi kan a ɔye “sua” no a yebotum aka dɛ ɔye asendwow osiandɛ onnyi mbataho biara wɔ noho. Sɛ yɛfa dza ɔtɔ do ebien no a, ɔye asendua osiandɛ ɔfa nsesamu mɔɔfem “e” bata noho nna afei so ɔwɔ ntsease. Mfatoho a ɔtɔ do ebiase no ye beesi osiandɛ ono so fa nyafimu mɔɔfem “e...fo” bata noho a ɔsesa no fi nyɛɛ bɛyɛ dzin. Yenyim dɛ beesi na otum fa nyafimu mɔɔfem bata noho. Iyi ntsi sɛ yɛhwɛ a kasafua “sua” ye asendwow, onoara so ye asendua na ɔsan so bɛ beesi.

TSIR EBIASA

NKASAFUA NYEE WO AKAN MU (WORD FORMATION PROCESSES)

Akwan ahorow pii wo ho a yefa do nya nkasafua afofor ba Akan kasa no mu. Ansaana yebodo mu esuko no, hom mma yentse nkasafua nyae ase ansaana yeahwe akwan ahorow no mu bi. Nkasafua nyee ye kwan a yefa do ye nkasafua afofor anaa nya nkasafua afofor fi nkasafua a wowo ho dadaw no mu dze ka hen nkasafuakuw ho. Iyi kyere de yennya nkasafua afofor mmfi beebiara anaa de yemmba hen tsirmu ara gyan na yeye nkasafua mbom yenya fi nkasafua a wowo kasa no mu dada anaa kasa fofor bi mu.

Nkasafua nyee dzi dwumason papaapa wo kasa mu. Donalie (2002) ma yehu de German kasa mu no nkasafua nyee ma kasa no ne nkasafua tu mpon. Olagunju (2010) so kyere de nkasafua nyee tu kasa bi ne nkasafua mu mpon na oma wodwoso so. Se yeba Mfantse mu a, oda edzi pefee de ekyingye biara nnyi ho de yenam nkasafua nyee do nya nkasafua afofor pii ba kasa no mu a oboa ma yetum dandan mu.

Akwan ahorow pii wo ho a yenam do nya nkasafua afofor ba kasa bi mu. Mfantse mu no, akwan a wodzi akotsen papaapa nye mbataho/nsiho, nkasafua nkabomu na nkakuwho. Hen adzesua yi mu no yebohwe iynom na yedze nkasafua mfemee, blenden, nkasafua ntwitwado (clipping) na Kleteks (Clitics)

Mbataho/Nsiho (Affixation)

Mbataho anaa nsiho nye de yedze nsienyim anaa nsiekyir bi reka kasafua bi ho ma yeenya kasafua fofor. Johannes (1997) mu ma yehu de morfologyi dwumadzi ahorow a oko do wo Borfo mu no ne kese no ara gyina mbataho do. Okyere mu de mbataho ye kwan a yedze mfemfamho moofem beka moofem tsitsir bi ho ma yenya kasafua fofor. Osan kyere de yewo mbatahodze ahorow ebiase. Hon nye nsienyim (moofem a wodze hye kasafua bi enyim, nsiekyir (moofem a wodze hye kasafua bi ekyir) na nsimu (dza wodze hye kasafua bi ne finimfin).

Dolphyne (1988) so kyere de Akan mu no, yewo mbatahodze ahorow ebien: nisenyim na nsiekyir. Dolphyne kyere nsienyim mu de oye moofem a wodze hye asendua bi enyim nna nsiekyir ye moofem a wodze hye asendua bi ekyir. Owu-Ewie (2000) so si dza Dolphyne (ibid) ka no pi de mbatahodze ebien na yewo no wo Akan mu.

Mfatoho:

Kasafua

Nsienyim

dua	n	-	ndua
ɔbaa	m	-	mbaa

kasafua	Nsiekyir		
dɔ	fo	-	dɔfo
kuna	fo	-	kunafo

Nsimu a ɔyɛ mbatahodze no kor a wɔdze hyɛ asɛndua anaa kasafua no ne finimfin no, nhwehwɛmu nnkɔr do papa wɔ ho wɔ Akan mu. Nwomanyimfo ahorow a wɔayɛ nhwehwɛmu wɔ mbataho mu wɔ Akan kasa mu no mmbɔ nsimu dzin wɔ hɔn nhwehwɛmu ahorow no mu. Iyi reye aye dɛ dza bi nnyi Akan mu (Hwɛ: Akpanglo-Nartey, 2002; Andoh-Kumi 1995; Dolphyne, 1988; Owu-Ewie 2009).

Dɛm dwumadzi yi ma yehu dɛ nsimu yɛ mbatahodze bi a bi wɔ Akan mu dɛ mbɛɛ ɔwɔ Borɔfo mu no na mbom nhwehwɛmu na ɔnnkɔr do wɔ ho. Sɛ yɛfa nyɛɛ bi tse dɛ “ba” (to come) yɛ mfatoho na sɛ yɛdze dzi dwuma wɔ nhyɛ mu a, yɛdze nsimu anaa mbatahodze “r” hyɛ asɛndua no mu anaa ne finimfin ma yenya “bra.” Iyi ma otum da edzi pefee dɛ nsimu yɛ mbatahodze bi a bi wɔ Akan mu na mbom nhwehwɛmu na ɔnnkɔr ekyir wɔ ho.

Nkasafua Mfɛmee (Borrowing)

Nkasafua mfɛmee yɛ kwan kor so a yɛnam do yɛ nkasafua anaa yenya nkasafua afofor ba kasa bi mu. Zapata (2000) kyɛrɛ nkasafua mfɛmee mu dɛ ɔyɛ kwan a yɛfa nkasafua bi fii kasa bi mu ba kasa fofor mu. Nkasafua mfɛmee taa si wɔ ber a biribi fofor bi aba nyimpakuw bi hɔ a wonnyi dɛm adze no ho nyimdzeɛ na mbom wohia kasafua bi akyerɛkyɛrɛ dɛm adze kor no no su no, wotum fɛm kasafua anaa adze kor no ne dzin fii kasa fofor a ɔwɔ dɛm kasafua no hɔ.

Dɛm a nna nkasafua mfɛmee nye dɛ yɛrefa kasafua bi efi kasa bi mu dze aba kasa kor so anaa kasa fofor mu wɔ ber a yɛnnsesa ntseaseɛ no na dza kasafua no gyina hɔ ma no. Nkasafua pii na ɔwɔ Akan mu a wɔfɛmee fii kasa ahorow tse dɛ dza ɔwɔ ase ha yi mu bi.

Mfatoho:

skuul	-	school
kɔɔpow	-	cup
atar	-	attire
lore	-	lorry

mango	-	mango
watse	-	watch
asorotoo	-	assorted

Dza ɔwɔ de yehye no nsew nye de se yefem kasafua bi ba kasa bi mu a, dem kasafua no no fonologyi na mofologyi nyinara so yefa ka ho. Ono nye de se yefem kasafua bi a, mpen pii no kwan a wosi bo dzin na akyerew no nntaa nnsesa. Mpo se nsesa bi beba mu a, ɔye kakraabi. Bio, ɔwɔ de yesan hu de yetum nam hen nkitahodzi a yenye amanaman bi nya tum fem hon nkasafua ka hendze ho.

Nkasafua Nsisiennyim/Blenden (Blending)

Nkasafua nsisiennyim anaa blenden nye de yerefa nkasafua ebien a wɔwɔ ho dadaw hon afaafa bi dze esisi enyim ma wɔabeye kasafua fofor (Akpanglo-Nartey, 2002). Yule (1995) so kyere mu de nkasafua nsisiennyim anaa blenden ye nkasafua afaafa ebien bi a woka bo mu ma wɔbeye kasafua kor wo ber a yefa kasafua kor ne fa a odzi kan na kor so ne fa a ɔto do ebien. Blenden ye kwan bi a onndzi akotsen wo nkasafua nyee mu wo Akan mu ntsi nwomanyimfo pii nnyee ho nhwehwemu naaso ɔwɔ de yehu de oka akwan a yenam do nya nkasafua ba Akan kasa mu no ho.

Mfatoho:

kunfor	-	kun + fofor
ayefor	-	ɔyer + fofor
etudur	-	etur + edur
aboroko	-	aborofo + akoko
aborobe	-	aborofo + abe

Dem nhwehwemu mu gyina mfatoho a ɔwɔ sor ha yi do da no edzi de blenden anaa nkasafua nsisiennyim ka kwan a yenam do ye nkasafua afofor wo Akan mu no ho.

Nkasafua Ntwitwado (Clipping)

Andoh-Kumi (1995) kyere nkasafua ntwitwado mu de ɔye kwan a kasafua bi ne selabol kor anaa no mboree fi ho. Ntsewdo no anaa selabol ne nyii no botum ako do wo ahyese, mfinimfin anaa ewiei. Perrin (1972) so kyere de nkasafua ntwitwado ye kwan a yenya kasafua fofor bi wo ber a yetsew kasafua bi a ɔwɔ ho dadaw ne selabol do. Nhwehwemu yi so kyere nkasafua

ntwitwado mu de ɔye kasafua bi ne selabol kor anaa no mboree befi ho ma yeenya kasafua foror wo ber a ntseasee a ɔwo ho dadaw no nnsesa.

Mfatoho:

esubɔntsen	-	esutsen
perentoa	-	toa
abɔdomaba	-	abɔdoma
adasemaaba	-	adasema
yafun mu	-	yamu
enyiwa	-	enyi
apɛtɛhyi	-	apɛt

Mfatoho a ɔwo sor yi da no edzi de nkasafua ntwitwado so ye kwan a yenam do nya nkasafua afofor ba Akan kasa mu no mu kor.

Kleteks (Clitics)

Mɔfɔlɔgyi mu no kletek ye mɔɔfem bi a sentase mu no wohu no de ɔye kasafua a ɔwo ntsease naaso nankotsee nntum ngyina noho do gyede ɔdan kasafua foror bi anaa wɔdze fam kasafua foror bi ho ansaana oedzi dwuma anaa yeehu no dwumadzi.

Mfatoho

- a. ɔda
- b. eda
- c. idzi

Se yehwe mfatoho a ɔwo sor ha yi a mɔɔfem ahorow a yedze aye nsienyim ama nkasafua no nyinara ye nkasafua wo sentase mu a wɔwo ntsease naaso no mu biara nnyi ho nankotsee botum egyina edzi dwuma gyede wɔdze abata nyee noho ansaana.

Nkakuwho (Reduplication)

Dolphyne (1988) kyerɛ nkakuwho mu de ɔye nkasafua nkabɔmu ne fa bi a yedze asɛndua bi ne fa anaa asɛndua noara kor so fam ho. Owu-Ewie (2000) so kyerɛ mu de, “Nkakuwho nye de yerobo asɛndua bi ho anaaso yedze ne fa bi reye nsienyim ama asɛndua no”. Abakah (2014) so kyerɛ de nkakuwho ye “mɔfɔlɔgyi kwan bi a yedze asɛndua bi ne fa ye nsienyim anaa nsiekyir ma

asendua no.” Okyere de odu mber bi a yetum yedze fa no hye finimfin. Andoh-Kumi (1995) so si no dua de nkakuwho ye kasafua bi no kor anaa ne fa bi a wodze ka asendua no ho.

Dem a nna nkakuwho ye kwan a wodze asendua bi no kor anaaso ne fa bi ka asendua no ho a dza wodze reka ho no tum hye asendua no n’enyim anaa n’ekyir. Nkakuwho gu mu ahorow ebien: nkakuwho a wodze asendua noara kor ka ho ntsi mefre no nkakuwho a oye mu nna dza wodze asendua no ne fa bi ka ho ntsi mefre no nkakuwho a oye fa (Hwe: Abakah, 2014; Akpanglo-Nartey, 2002; Dolphyne, 1988).

Se yeka nkakuwho a oye mu a, ono nye de yereka asendua bi no kor ekuw ho anaaso yedze asendua noara kor so reka ho.

Mfatoho:

nsu	-	nsunsu
pa	-	papa
dzi	-	dzidzi
ntsem	-	ntsentsem

Nkakuwho a oye fa so nye de yerisi kasafua anaa asendua bi ne fa do anaa yedze asendua bi ne fa beebi beka asendua noho.

Mfatoho:

nom	-	nonom
tar	-	tetar
hor	-	hohor
ka	-	keka
ye	-	yeye
to	-	toto
bo	-	boboto

Akan mu no, nkakuwho no tum ye dza yedze bo ho ebien, ebiasa, anan anaa mpo no mboree. Bio, Akan mu no nkasafua a yetum ka kuw ho nye edzin, nyee, dzintamsi na nyetamsi. Yesan so wo nkasafua a hon abose no woye nkakuwho.

Edzin nkakuwho

Dolphyne (1988) na Abakah (2014) kyere de se yeba edzin nkakuwho mu a, edzin no hon dodow nkotsee na wotum ka kuw na dza wobenya no ye dzin a wo dodow mu no no mboho.

Mfatoho:

Dzin	dodow	nkakuwho
dua	ndua	nduandua
ɔman	aman	amanaman
fie	efie	efiefie
abofra	mbofra	mboframbofra

Ɔwɔ mu dɛ mpɛn pii no edzin a wɔyɛ dodow na yɛtaa ka kuw ho naaso dem nhwehwɛmu yi reda no edzi dɛ edzin a wɔwɔ ankonam mu so yetum bɔ ho anaa ka kuw ho ma ɔyɛ yie. Dza ɔwɔ ho mbom nye dɛ sɛ yɛka ankonam dzin bi kuw ho a, dzin no sesa bɛyɛ dzintamsi.

Mfatoho:

abofra	-	abofrabofra
banyin	-	banyimbanyin
basia	-	basiabasia

Adze kor so a yebotum ahyɛ no nsew wɔ edzin nkakuwho mu nye dɛ Akan mu no, yetum ka edzin a yetum kan na edzin a yenntum nnkan nyinara kuw ho na mbom sɛ yɛka edzin a yenntum nnkan kuw ho a, ɔno dzin no sesa bɛyɛ dzintamsi.

Mfatoho:

nsu	-	nsunsu
anhwea	-	anhweanhwea
nkyen	-	nkyenkyen
mbɔgya	-	mbɔgyambɔgya

Bio, dem nhwehwɛmu yi ma yehu dɛ edzin nkakuwho mu no kasafua anaa asɛndua noara kor so na yɛdze ka ho anaa yɛdze bɔ ho. Yenntum mmfa asɛndua no ne fa bi nkuw ho anaa mmɔ ho wɔ edzin nkakuwho mu.

Nyɛ nkakuwho

Akan nyɛ nkakuwho wɔ ntseasee mu no kyere mpɛn dodow a nyɛ no kɔ do anaa ɔkor do (Abakah, 2014).

Mfatoho:

dzi	-	dzidzi
-----	---	--------

posa	-	posaposa
gye	-	gyegye
petse	-	petsepetse

Nyɛɛ a wɔaka ekuw ho wɔ Akan mu no dzi dwuma ahorow pii. Bi nye yi:

- i. Wotum nam nyɛɛ a wɔaka ekuw ho do dze kyere de ayefo a woridzi dwuma wɔ asentɔw mu no doɔso.

Mfatoho:

- a) Basia no fura tam - Mbasiafo no furafura atam
- b) Abofra no da famu - Mbofra no deda famu

- ii. Otum so kyere de nyɛɛ no wɔ ɔyetsia bebree.

Mfatoho:

- a) Papa no ebu dua no - Papa no ebubu ndua no
- b) Kwesi akye abowa no - Kwesi akye mbowa no

- iii. Nyɛɛ a wɔka kuw ho tum ma nyɛɛ bi a ɔfa ɔyetsia sesa beye nyɛɛ a ɔmmfa ɔyetsia.

Mfatoho:

- a) Abofra no dzi edziban no - Abofra no dzidzi
- b) Kwesi ronom nsa - Kwesi rononom

Sɛ yɛhwɛ mfatoho a odzi kan a ɔyɛ “Abofra no dzi edziban no” yi a, yehu de nyɛɛ “dzi” yɛ nyɛɛ a ɔfa ɔyetsia ntsi ne ɔyetsia wɔ asentɔw yi mu nye “edziban” a ɔyɛ dzin. Sɛ wɔka kuw ho pɛr a ɔsesa no su ntsi onntum mmfa ɔyetsia “edziban” bio ntsi sɛ ɔba no dem a yegya no demara anaa mpo sɛ wɔdze kasafua bi bedzi ekyir a, nna ɔwɔ de ɔyɛ nyɛtamsi na mbom nnyɛ dzin. Dem a yebotum enya biribi de: “Abofra no dzidzi dodow” na mbom yennkotum enya biribi de: “Abofra no dzidzi edziban”. Demara na mfatoho a ɔtɔdo ebien no so tse. Dza ɔwɔ de yɛhyɛ no nsew nye de mpen pii no nyɛɛ nkakuwho kyere mpen dodow a nyɛɛ no kɔ do anaa ɔkɔr do.

Dzintamsi nkakuwho

De mbre yetum yɛka edzin na nyɛɛ kuw ho no, demara so na yetum bɔ dzintamsi ho. Abakah (2014), Dolphyne (1988) na Owusu-Ansah (1995) kyere de sɛ yɛka dzintamsi kuw ho anaa bɔ ho a, ɔtsi dzintamsi no mu na mpen dodow a yɛdze bɔbɔ ho no na ɔkyere ntsimu no n’anodzen.

Mfatoho:

- pa - papa, papaapa

few	-	fɛɛfɛw, fɛfɛɛfɛw
hu	-	huhuuhu

Nkasafua a hɔn abɔse noara no wokuw ho

Nkasafua bi wɔ hɔ a hɔn abɔse noara anaa asendua noara yɛ nkakuwho. Abakah (2014) kyere dɛm nkakuwho yi mu dɛ wɔyɛ nkasafua a hɔn asendua no yɛ nkakuwho naaso wonnyi ɔfa biara a wɔdze aka ho. Dɛm nhwenhwɛmu yi so kyere nkakuwho a ɔtse dɛm mu dɛ ɔyɛ kasafua a yehu no dɛ dza wɔaka ekuw ho naaso wonnyi ɔfa biara a wɔdze aka ho. Bio, yetum kyere mu dɛ ɔyɛ kasafua bi a wonntum nkyɛ mu nnya asendua na nkuwho.

Mfatoho:

fenemfenem

sisi

susu

sasaw

kakaw

sasa

sunsum

Sɛ yɛfa mfatoho a ɔwɔ sor ha yi a, yennkotum akyekye mu ebien ma wɔatɔ asowa mu na ɔakyere adze kor noara. Bio, nkasafua a wɔtse dɛm no so sɛ yeyi dza ɔyɛ edzin na nyɛ no fi hɔ a, dzintamsi no yebotum abɔ ho mpen pii.

Mfatoho:

fenemfenem - fenemfenemfenemfenem

dɔkɔdɔkɔ - dɔkɔdɔkɔdɔkɔdɔkɔdɔkɔdɔkɔ

Nkasafua Nkabɔmu (Compounding)

Nkasafua nkaɔmu yɛ kwan kor a yetaa nam do nya nkasafua afofor ba Akan kasa mu. Yule (1995) kyere nkasafua nkaɔmu mu dɛ ɔyɛ nkasafua ahorow ebien a wɔka bɔ mu na wɔbeyɛ kasafua kor. Olagunju (2010) so hu nkasafua nkaɔmu dɛ ɔyɛ kwan a yɛkeka nkasafua bɔ mu ma wɔbeyɛ nkasafua afofor. Donalies (2002) so kyere n'adwen dɛ nkasafua nkaɔmu yɛ nkasafua ebien anaa mɔɔfɛm tsitsir ebien a wɔka bɔ mu ma wɔbeyɛ kasafua kor.

Ramlan (1985: 69) so n'adwenkyere wɔ nkasafua nkabɔmu ho nye de, "Oye kasafua kor a no mu mba ye nkasafua ebien." Akpanglo-Nartey (2002) so kyere de nkasafua nkabɔmu ye nkasafua ebien na no mboree a yeka bɔ mu ma obeye kasafua kor a ntseasee wɔ mu. Appah (2013a) na Andoh-Kumi (1995) so kyere nkasafua nkabɔmu mu de oye kwan a yefa do nya kasafua fofor bi wɔ ber a yeka nkasafua ebien bɔ mu a dem nkasafua ebien no so no mu kor biara tum gyina noho do wɔ kasa no mu.

Rahardjo (1983: 159) dze ntseasee a odzi mu yie ma nkasafua nkabɔmu wɔ no buukuu (Iktsisar Tuta Bahasa Indonesia) mu na okyere de, "Nkasafua nkabɔmu ye kwan a yeka nkasafua ebien na no mboree a wobɛn ho bɔ mu ma ntsi obeye kasafua kor na oma ntseasee fofor."

Kwan potsee biara nnyi ho a yetum gyina do dze kyerekyere nkasafua nkabɔmu mu wɔ Akan mu. Dem ntsi dem dwumadzi yi kyere nkasafua nkabɔmu mu de oye kwan a wodze nkasafua ebien na no mboree a wotum gyina honho do wɔ kasa no mu bɔ mu ma obeye kasafua kor a ne ntseasee no nye nkasafua a wowɔ mu no se anaaso oye soronko.

Anane (2010) kyere de nkasafua a woka bɔ mu ma oye kasafua fofor no nkyerekyere biribi anaa ndzeyee bi a ofa dza nkasafua a woka abɔ mu no mu kor biara gyina ho ma. Osan kyere mu de odu mber bi a, nkasafua a woka bɔ mu no hon ntseasee da edzi wɔ kasafua fofor no ne ntseasee mu.

Mfatoho:

asɔr	+	dan	=	asɔrdan
nsu	+	hyew	=	nsuhyew
ɔhen	+	fie	=	ahemfie

Odu beebi so a, oye dzen de ibohu nkasafua a woka bɔ mu no hon ntseasee wɔ kasafua fofor no ne ntseasee mu.

Mfatoho:

sika	+	kɔkɔɔ	=	sikakɔkɔɔ
akoko	+	dur	=	akokodur
gye	+	dzi	=	gyedzi

Dza owɔ de yehye no nsew nye de owɔ mu de nkasafua ebien na yeka bɔ mu nya nkasafua nkabɔmu naaso nnye nkasafua ebien biara na yebotum yeaka abɔ mu enya kasafua fofor a ɔto asowa mu. Nkasafuakuw ahorow a yetum ka bɔ mu nya nkasafua nkabɔmu bi na oka do yi:

dzin + dzin

dzin	+	dzintamsi
dzin	+	nyee
nyee	+	nyee

Nkasafua nkabomu nkyekyemu

Se yeba nkasafua nkabomu nkyekyemu mu a, kwan potsee anaa kwan kor biara nnyi ho a yetum gyina do ye nkyekyemu no. Onam dem ntsi akwan ahorow pii wo ho a wodze kyekye nkasafua nkabomu mu. Akan mu no, kwan tsitsir a wotaa gyina do ye nkasafua nkabomu mu nkyekyemu nye nkasafua ahorow a woka bo mu no hon nkasafuakuw a wofi mu anaa hon sentase na tuon do. Iyi mma onndzi mu nnwie, osiande akwan ahorow bi so wo ho a wotum gyina do dze kyekye nkasafua nkabomu mu.

Sentase nkyekyemu

Sentase ye adzesua a ofa asentow, asemfua anaa asempruw nhyehyee ho. Ono nye de sentase boa ma yehu kwan a kasa bi fa do hyehye nkasafua ma wobeye nsemfua, nsempruw na nsentow. Dza owow sentase ho nye de kasa biara na ne nkasafua nhyehyee a odze dzi dwuma wo asentow mu. Kasa biara wo ne mbra a okyerε kwan a wonsi nhyehyε nkasafua anaa nkasafuakuw no wo asentow mu. Akan mu no, oyefo dzi kan ba ansaana nyee nna oyetsia atoa do. Iyi nye Akan asentow nhyehyee.

Sentase kwan tsitsir a wogyina do dze kyekye nkasafua nkabomu mu nye de wohwe nkasafuakuw a nkasafua a woka bo mu no fi mu. Akan nkasafua nkabomu nkyekyemu ahorow a woako do no ne kesenara wogyinaa dem kwan yi do (Hwe: Andoh-Kumi, 1995; Dolphyne, 1988; Owu-Ewie, 2000).

Se yegyina nkyekyemu ahorow a Dolphyne (1988), Anderson (2013), Anyidoho (1990), Marfo (2004), Akpanglo-Nartey (2002) na Owu-Ewie (2000) yee do a, nkasafua nkabomu ahorow esia na wodze to gua. Hon nye:

1. Dzin – Dzin nkasafua nkabomu

Dem kuw yi ye nkasafua nkabomu a no mu mba no nyinara ye edzin.

Mfatoho:	Dzin	+	Dzin	=	Nkabomu
	asor		dan		asordan
	ohen		fie		ahemfie
	obaa		warfo		obaawarfo

fahodzi da fahodzida

2. Dzin – Dzintamsi nkasafua nkabɔmu

Dɛm nkabɔmu yi so yɛ dza no mu mba no yɛ dzin na dzintamsi.

Mfatoho:	Dzin	+	Dzintamsi	=	Nkabɔmu
	nsu		hyew		nsuhyew
	da		bɔn		dabɔn
	asɛm		kɛsɛ		asɛnkɛsɛ

3. Dzin – Nyɛɛ nkasafua nkabɔmu

Iyi mu no dzin na nyɛɛ na wɔka bɔ mu yɛ kasafua kor no.

Mfatoho:	Dzin	+	Nyɛɛ	=	Nkabɔmu
	adze		sua		adzesua
	manso		twe		mansotwe
	atar		hyɛ		atarhyɛ

4. Dzintamsi – Dzin nkasafua nkabɔmu

Dzintamsi na dzin na wɔka bɔ mu yɛ dɛm nkasafua nkabɔmu yi

Mfatoho:	Dzintamsi	+	Dzin	=	Nkabɔmu
	akɛsɛ		asɛm		akɛsɛsɛm
	enyimnyam		ɔhɛn		enyimnyamhɛn
	fɛɛfɛw		adze		afɛɛfɛdze

Fɔnɔlɔgye nhyehyɛɛ mu no sɛ yɛnya nkasafua ebien a yɛrɛka abɔ mu, na dza odzi kan no dze ndze ngyegyɛɛ wie anaa anomu ngyegyɛɛ ‘m’, ‘n’ anaa ‘w’ wie na kasafua a ɔtɔ do ebien no so dze ndze ngyegyɛɛ hyɛ ase a, ndze ngyegyɛɛ a ɔwɔ kasafua a ɔtɔ do ebien no mu no yew. Iyi ntsi na ndze ngyegyɛɛ a ɔwɔ nkasafua a wɔtɔ do ebien wɔ mfatoho no mu no ayew no.

5. Nyɛɛ – Dzin nkasafua nkabɔmu

Nyɛɛ na dzin na wɔka bɔ mu wɔ dɛm kuw yi mu.

Mfatoho:	Nyɛɛ	+	Dzin	=	Nkabɔmu
	gye		nkwa		agyenkwa
	bɔ		dzin		abɔdzin
	yɛ		adze		ayɛdze

6. Nyɛɛ – Nyɛɛ nkasafua nkabɔmu

Dem nkasafua nkabomu kuw yi no mu mba ye nyee na nyee

Mfatoho:	Nyee	+	Nyee	=	Nkabomu
	gye		dzi	=	gyedzi
	su		fre		sufre
	so		hwe		nschwe

Dza yehu nye de ekuw esia ahorow a Dolphyne (1988), Anderson (2013), Anyidoho (1990), Marfo (2004), Akpanglo-Nartey (2002) na Owu-Ewie (2000) dze to gua no nyinara ye dza no mu mba no fi nkasafuakuw etsitsir no mu a oye dzin, dzintamsi na nyee mu. Yebotum so enya nkasafua nkabomu a no mu mba no fi nkasafuakuw nkakramba a oye dzin-bea nkitahodzi, oyikyere na adze no so mu.

Mfatoho:	Nyee	+	Dzin-bea nkitahodzi	=	Nkabomu
	tsi		mu		ntsimu
	ko		do		nkodo
	Dzin	+	Dzin-bea nkitahodzi	=	Nkabomu
	Enyigye		mu		enyigye mu
	Kokoa		mu		kokoa mu

REFERENCES

- Abakah, E. N. (2014). On tone and morphophonology of the Akan reduplication construction. *Journal of Universal Languages*, 15-2.
- Agyekum, K. (2010). *Akan Kasa Nhyehyɛɛɛ*. Accra: Dwumfour Ghana Ltd.
- Anderson, S. R. (1988). Morphological Change. In Newmeyer, Frederick (eds), *Linguistics: the Cambridge Survey* Vol. 1. Cambridge: Cambridge University Press.
- Andoh-Kumi, K. (1995). *Basic Akan Grammar*, Accra: Typed Co. Ltd.
- Aronoff, M. (1976). *Word Formation in Generative Grammar*. Cambridge, MA: MIT Press.
- Bickel, B. & Nichols, J. (2007). Inflectional Morphology. In Stoven, T (ed.), *Language Typology and Syntactic Description, Vol. 3: Grammatical Categories and the Lexicon*. 2nd edn. Cambridge: Cambridge University Press, 169 – 240.
- Boadi, L. A. (2002). *Tense, Aspect and Mood in Akan*. In F. K. Ameka and E. M. K. Dakubu (Eds) 9-68.
- Dolphyne, F. (1988). *The Akan (Twi-Fante) language: Its sound systems and tonal structure*. Accra: Ghana University Press.
- Haspelmath, M. & Sims, A.D. (2010). *Understanding Morphology*. London: Hodder Education.
- Matthews, P .H (1976) *An Introduction to the theory of Word Structure*. Cambridge University Press, Cambridge.
- Thakur, D. (1997). *Linguistic simplified (Morphology)*. New Delhi. Bharati Bhawan Publishers & Distribution.
- Yule George (2010) *The Study of Language*. Cambridge: Cambridge University Press. 4th Ed.